

Primerë cartë nabëquë'ë San Pablo lu ra Tesalonicenses

Bëquë'ë Pablo tubi cartë lu grupë shtë shmënë Dios naquërelde guë'dchi Tesalónica

1 Na Pablo quëquëa'a cartë rë' con Silvano nu Timoteo lu ra grupë shtë shmënë Dios, ra naquërelde guë'dchi Tesalónica. Dios Shtáda'a con Jesucristo Shláma'a gudili lë'ë të; na të shmënë më. Rna'ba lu Dios Padre nu lu Dadë Jesucristo gunë më llëru'bë favurë parë lë'ë të, nu rna'ba lu më gunë më compa'ni lë'ë të, të cuedchí ldu'u të.

Rna ra mënë lla zianaldë ra më Tesalónica shnezë më

²Iurë ruadi'dzënú na'a Dios, siemprë rna'bë na'a lu më por lë'ë të. Siemprë rdë'ë na'a graci lu më por lë'ë të. ³Rëagná ldu'u na'a lë'ë të iurë rna'bë na'a lu Shtáda'a Dios por lë'ë të. Rëagná ldu'u na'a de quë demasiadë rialdí ldu'u të Dios nu rëagná ldu'u na'a tsagla'guë gunë të shchi'ni më con guëdubinú ldu'u të. Nalé rac shtu'u të lë'ë më, nu zuga'a të firmë shnezë më purquë quëbezë të tiempë naguëdchini Dadë Jesucristo stubi

vuiltë lu guë'dchiliu. ⁴Rnia'a lu të, bëchi la sa' hia'a, nané na'a rac shtu'u Dios lë'ë të nu gulé më lë'ë të parë gac të shmënë më. ⁵Pues dzë ni biadi'dzë na'a lu të diza'quë, be'dë guëni'i na'a con pudërë shtë Espíritu Santo, lëdë niá'asëdi'i con di'dzë nadia'a na'a. Bëdchini na'a lu të purquë nané na'a ra di'dzë rë' nahin verdá shtë Dios. Nu mizme lë'ë të rdë'ë të cuendë lla bëlezënú na'a lë'ë të parë bien shtë të purquë rac shtu'u na'a lë'ë të.

⁶Rgubënebi të ziquë dzudë'në na'a nu rgubënebi të lo quë nabë'në Dadë Jesús. Iurë gualdí ldu'u të diza'quë, demasiadë rquitë ldu'u të purquë quëbezënú të Espíritu Santo la'ni ldu'u të. Guc të shmënë Jesús perë mizme tiempë guzunaldë mënë lë'ë të demasiadë. ⁷Ra mënë narialdí ldu'i diza'quë regiuni Macedonia nu Acaya, guná rall lla mudë quërelde të; na të ejemplë parë lë'ë rai'. ⁸Guaglua'a të diza'quë shtë Dadë Jesús lë'ë ra mënë, lëdë niétiquë ra naquërelde Macedonia nu Acaya sino quë lu grë ra naquërelde alreduerë ra regiuni rë'. Por ni adë rquí'nidi'i pë guëni'i na'a de lë'ë të lu ra mënë

purquë nané rall lla nabani të. ⁹Lo mizmə lë'ë rall ruadi'dzë rall mudë nabë'në të recibir lë'ë na'a dzë nabitë guëná na'a lë'ë të. Ruadi'dzë rall lla bësa'në të ídolo shtë të parë guanaldë të shnezë Dios, më nanabani. Lueguë guzublú bëzu'bë diaguë të shti'dzë Dios verdadërë. ¹⁰Nu ruadi'dzë rall lla quëbezë të Jesús, shini Dios. Quëbezë të dzë guëabrí më de gube'e, lo mizmə Jesús nabëldishtë Dios ladi ra tēgulë. Jesús ni gunë më salvar lë'ë hia'a lu cashtigu dushë naguëshe'ldë Dios parë ra mënë shtë guë'dchiliu.

**Mudë nabë'në Pablo dchi'ni
guë'dchi Tesalónica**

2 Mizmə lë'ë të bëchi la sa' hia'a, nané të dzë nabe'dë guëná na'a lë'ë të, adë gúquëdi'in sin resultadë. ²Bien nané të guzunaldë ra mënë lë'ë na'a guë'dchi Filipos antsë bēdchini na'a Tesalónica. Guni'i guidzë ra mënë lë'ë na'a nu bëquë'ë hiaguë rall lë'ë na'a, parë Dios bë'në compa'ni lë'ë na'a. Con guëdubinú ldu'u na'a biadi'dzë na'a ra diza'quë lu grë të. Adë bēdzēbēdi'i na'a aunquë nalë guzunaldë ra mënë lë'ë na'a. ³Adë bēsiguēdi'i na'a lë'ë të purquë ra di'dzë nabēlua'a na'a lë'ë të nahin verdá. Guquërelde za'quë na'a con lë'ë të, lēdēdi'i con ra llgabë mal. Be'dë guēni'i na'a lu të parë tsanaldë të nezë za'quë shtë Dios. ⁴Iurë bēdēdē na'a lu prēbē shtë Dios, bē'nē më incarguë lë'ë na'a ra diza'quë shtë më nangunë salvar lë'ë hia'a. Zni riagni'i na'a shti'dzë më lu ra mënë. Adë riagni'i na'a

diza'quë lu ra mënë niétiquë parë gac shtu'u rall lë'ë na'a sino quë dzudë'nē na'a shchi'ni Dios, el quë narnibē'a lë'ë na'a. Dios na testigu de quë verdá na llgabë shtë na'a. ⁵Cumë ziquë nané të nunquë adë bēluá'adi'i na'a lë'ë të con di'dzë chulë naruadi'dzë ra mënë shtë guë'dchiliu, nu adë bēluá'adi'i na'a lë'ë të con protēstē parē nadchisú na'a shtumí të. Dios nané më grë ra di'dzë rē' nahin verdá, grë di'dzë narni'i na'a lu të. ⁶Nunquë adë rguílidi'i na'a parē gac na'a më ru'bē lu ra mënë, nilē lē'ë të, nu nilē ra naquërelde ra stubi ladē, perē ziquë muzē shtë Jesús naná na'a, napē na'a derechē parē niana'bē na'a lu të ra cusē narqui'ni na'a perē adē chu bē'nēdi'in. ⁷Mejurē bēdē'nē nadu'u na'a lu të ziquë tubi na'a narac shtu'u ra shíni'. ⁸Tantē rac shtu'u na'a lē'ë të, be'dē guēni'i na'a diza'quë shtë Dios lu të nu bēdē'nē na'a sirvē lu të purquë llēru'bē cari'ni nadapē na'a parē lē'ë të. ⁹¿Gu rēagná ldu'u të bëchi la sa' hia'a, lla bēdē'nē na'a dchi'ni hashtë bēdzaguë na'a parē gudili na'a nagudáu na'a? Dzē ni be'dē guēni'i na'a diza'quë shtë Dios lu të. Bēdē'nē na'a dchi'ni dzē la gue'lē parē adē pē guná'bēdi'i na'a lu të.

¹⁰Lē'ë të naná rialdí ldu'u diza'quë, nané të nu rna Dios lla guquërelde'nú na'a lē'ë të. Guquërelde za'quë na'a con lē'ë të sin ni tubi llgabë mal. Adē gunádi'i të bēdē'nē na'a duldē iurní purquë vidē shtë na'a limpi nahin delante lu Dios. ¹¹Cadē lē'ë të nané të lla mudē biadi'dzē'nú na'a lē'ë të lla

gunë të. Guni'inú na'a lë'ë të cadë tubi të cumë ziquë rni'inú shtadë llguë'në lë'ë llguë'në. ¹²Guni'i na'a lu të con guëdubinú ldu'u na'a; bëne'e na'a cunseju parë guëbani të tubi vidë naná rëuu' ldu'u Dios. Guna'bë Dios lë'ë të parë tsutë të lugar catë rribë'a më, catë nanú pudërë nu llni shtë më.

¹³También rdë'ë na'a graci lu më guëdubi tiempë purquë dzë ni, bëquë diaguë të diza'quë shtë Dios. Tiempë nabe'dë guëni'i na'a lu të, bë'në të recibirin ziquë lë'ë më niani'i më lu të. Adë bé'nëdi'i të recibirin ziquë di'dzë përchu, purquë de verdá na rahin diza'quë shtë Dios narunë cambi vidë shtë të. ¹⁴Pues rnia'a lu të bëchi la sa' hia'a, dzë ni guzunaldë ra mënë ladzë të lë'ë të, gulubënebi të ziquë bë'në ra shmënë Dadë Jesús nanaré Judea. Ra më israelitë guzunaldë rall lë'ë ra grupë shtë shmënë Dios, nu ra më ladzë të guzunaldë rall lë'ë të purquë rialdí ldu'u të diza'quë. ¹⁵Ra më israelitë gudini rall lë'ë Dadë Jesús nu gudini rall ra nabiadi'dzë shti'dzë Dios lu rall. Mizmë manërë bëquë guia'a rall shti'dzë na'a. Adë quërelde zá'quëdi'i rall delantë lu Dios. Rldë rall nu rzu rall lu grë mënë. ¹⁶Nu adë gunëdi'i rall niagni'i na'a diza'quë lu ra mënë nanádi'i më israelitë parë gac salvar rall. Por lo quë naquëhunë rall, ziaru'bë ra duldë shtë rall. Iurne' bëdchini cashtigu dushë shtë Dios guëc rall parë siempër.

**Rac shtu'u Pablo tsagnáhi' më
Tesalónica stubi vultë**

¹⁷Por partë shtë na'a rnia'a lu të bëchi la sa' hia'a, dzë nagunitilú

na'a lu të tubi tiempë, masiá adë chu rnádi'i lu të, perë siempër nanú të la'ni ldu'u na'a. Nu llëru'bë gan gupë na'a parë guená na'a lu të stubi. ¹⁸Guc ldu'u na'a nadë'pë na'a masiá niá'asë sulë Pablo. Guadza'guë vultë guc ldua'a nidë guna visitar lë'ë të perë cadë vultë narac shtua'a nelda, mëdzabë Satanás guzull lua parë adë bédëdia'a. ¹⁹Dzë naguidë Dadë Jesús stubi vultë, zuga'a të lu më; guëquitë ldu'u na'a con lë'ë të iurní. Nadapë na'a llëru'bë confiansë lë'ë të. ¿Chu gunë lëgrë ldu'u na'a iurë guëdchini më? pues mizmë lë'ë të gunë lëgrë të ldu'u na'a dzë ni. ²⁰Rbedchí ldu'u na'a con lë'ë të nu zihani mënë rni'i za'quë rall de lë'ë na'a purquë na të shmënë Dios.

3 Iurní hiadë biá'adi'iru'u ldu'u na'a sin quë adë nianá na'a lla nabani të nga'li; bédë'në na'a llgabë, mejurë guëdëa'në na'a lë'ësë na'a Atenas ²parë guëshe'ldë na'a Timoteo; guidë guënáhi' lë'ë të. Timoteo náhi' bëchi la sa' hia'a. Bëshe'ldë na'a Timoteo; bidë guëllí'i tubi nutici shtë të lla quërelde të nga'li. Timoteo náhi' tubi muzë shtë Dios nabë'në dchi'ni con lë'ë na'a iurë biagni'i na'a diza'quë shtë Jesucristo lu ra mënë. Bëshe'ldë na'a lë'i' parë guëni'inúhi' lë'ë të parë tsagla'guë të más firmë shnezë Dios ³nu parë ni tubi të adë guëdzébëdi'i nu nilë guëazë guëtëdi'i të shnezë më iurë rzunaldë mënë lë'ë të. Bien nané të de quë grë ra shmënë Jesús na rall designadë parë ra cusë durë rë'. ⁴Dzë nianá guquërelde'nú na'a lë'ë të, guni'i na'a lu të de quë

zunaldë ra mënë lë'ë hia'a. Zni guc cumë ziquë nané të. ⁵Por ni hiadë biá'adi'i ldua'a; bëshe'lda Timoteo parë bidë guënáhi' lë'ë të, gu nianá canaldë të shnezë Dios. Purquë bëdzëbë na'a niasini mëdzabë lë'ë të nezë mal. Iurní adë pë resultadë nane'e shchi'ni Dios nabëdë'në na'a ladjë të.

⁶Perë hia bëagrí Timoteo de Tesalónica. Be'dë guënúhi' ra nutici za'quë lla nabani të nu nianá rialdí ldu'u të diza'quë nu nianá rac shtu'u sa' të. Biadi'dzë Timoteo nianá rëagná ldu'u të lë'ë na'a nu nianá rac shtu'u të lë'ë na'a. Rní'i' napë të llëru'bë deseo de quë guëabrí guená lul sa' hia'a stubi vueltë, igual ziquë rac shtu'u na'a guená na'a lu të. ⁷Por grë naguni'i Timoteo lu na'a de lë'ë të bëchi, nalé rquitë ldu'u na'a. Masiá rldënú mënë lë'ë na'a nu rzunaldë rall lë'ë na'a, rbedchí ldu'u na'a purquë nianá ziagla'guë të firmë lu shnezë Dios. ⁸Iurë bini na'a de quë nianá zu të firmë lu diza'quë shtë Dadë Jesús, nahin ziquë vidë cubi parë lë'ë na'a. ⁹Adë rdzélëdi'i na'a guadë graci guëdë'lë na'a lu Dios por lë'ë të, tantë rquitë ldu'u na'a; bini na'a naguni'i Timoteo de lë'ë të. ¹⁰Dzë la gue'lë rna'bë na'a lu Dios, guëne'e më permisi lë'ë na'a parë guidë guená na'a lë'ë të parë guëlua' na'a lë'ë të narunë faltë tsasé të.

¹¹Rna'bë na'a lu Dios Padre, Shtáda'a nu lu Dadë Jesucristo Shláma'a de quë gunë më compa'ni lë'ë na'a parë gac guëdë'pë guená na'a lu të. ¹²Nu rna'bë na'a lu më gunë më compa'ni lë'ë të parë más gac shtú'uru'u të sa' të, nu

tsarú'bëru'u cari'ni nanapë të con sa' të con grë mënë, igual ziquë lë'ë na'a rac shtu'u na'a lë'ë të. ¹³Rac shtu'u na'a gunë më compa'ni lë'ë të parë su të firmë shnezë më. Rac shtu'u na'a cuezë të limpi delantë lu Dios, Shtáda'a, dzë guëdchini Dadë Jesús con grë ra tégulë nagualdí ldu'u diza'quë shtë më.

Mudë narac shtu'u Dios guëbani mieti

4 Iurne' rnia'a lu të bëchi la sa' hia'a, bëlua'a na'a lë'ë të lla mudë narac shtu'u Dios guëbani të nu nané na'a zni nabani të. Ziquë muzë shtë Dadë Jesús, rdë'në na'a ruëguë lu të nu rni'inú na'a lë'ë të de quë tsagla'guë guëbani të mudë narac shtu'u Dios. Znisë tsagla'guë gunë të.

²Hia nané të lla guni'i na'a lu të ra ldai' shtë Dadë Jesús purquë bëshe'ldë më lë'ë na'a guëni'inú na'a lë'ë të. ³Mudë narac shtu'u Dios guëbani të nahin, gunë të intriegu mizme lë'ë të lu Dios. Guëbani të niétiquë parë lë'ë më; adë chu guëquënúdi'i tse'lë sáhi'. ⁴Cadë nguii nanapë tsé'li' gac bé'all de quë rac shtu'u Dios guëbani za'quë rall con tsé'lëll. Gac shtú'ull tsé'lëll nu gúnëll honrar tsé'lëll. ⁵Adë gúnëll ziquë runë ra mënë nanadë guënédi'i Dios. Napë rall mal llgabë. Rac shtu'u rall gunë rall cumplir deseo mal nananú la'ni ldu'u rall. ⁶Adë gunë të duldë rë' con tse'lë sa' të; adë gunë të ofender sa'l purquë Dadë Dios guëdë'lë më tubi cashtigu dushë parë ra narunë duldë rë'. Hia guni'i na'a lu të nu biadi'dzë na'a lu të shcuendë ra

cusè ni. ⁷Dios guna'bè lè'è hia'a parè guèbani hia'a sin duldè delantè lu mè parè guèdàpa'a tubi vidè limpi lu mè. ⁸Bèshe'ldè Dios lè'è Espíritu Santo parè cuezènúhi' lè'è hia'a. El què narzu'bè diáguèdi'i di'dzè rè', quèhúnèll menos lè'è Dios, lèdè niá'asèdi'i lè'è na'a.

⁹Hiadè rquí'nidi'i guèquèa'a lu tè parè gac shtu'u sa' tè purquè lo mizmè Dios bèlua'a lè'è tè lla gac shtu'u sa' tè. ¹⁰Nu zni rac shtu'u tè grè shmènè Jesús naquèrèldè Macedonia. Perè rdè'nè na'a ruèguè lè'è tè, ra bèchi la sa' hia'a, gulè guaru'bè cariñi nanapè tè con sa' tè. ¹¹Gulè guni'i ldu'u tè guèbani za'què tè, adè pè dishi'bi. Gulè guni'i ldu'u tè gunè tè dchi'ni. Zni guni'i na'a lu tè antsè. ¹²Gulè bè'nin parè guèni'i za'què ra mènè nanadè rialdídi'i ldu'u diza'què; adè guèldènú rall lè'è tè sino guèni'i rall bien de lè'è tè. Zni adè pè gunè faltè parè lè'è tè.

Dzè guidè Jesús guédchiliu stubi vultè

¹³Rnia'a lu tè bèchi, rac shtu'u na'a gac bè'a tè pè gac con ra tègulè parè adè tsúdi'i ldu'u tè tristè ziquè nanú ldu'u ra narni'i iurè rati ra sa' rall, hiadè guèbrídi'i guèná lul sa' rall stubi vultè. ¹⁴Ziquè rialdí ldu'u hia'a de què Jesús guti nu guashtë mè ladi ra tègulè, zni rialdí ldu'u hia'a dzè guèshe'ldè Dios lè'è Jesús stubi vultè lu guédchiliu, guèdchinín mè grè tègulè nagualdí ldu'i diza'què shtë mè.

¹⁵Por ni rnia'a lu tè ra di'dzè shtë Dadè Jesús. Lè'è hia'a ra naguèa'nè guèbani hashtë dzè naguèdchini

mè, adè chu quiblúdi'i lu ra naguti parè tsepi gube'e ¹⁶purquè dzè ni, guini ra mènè tubi voz ziquè shtë rèy. Guini rall voz shtë tubi ianglè principal nu gu'ldè ianglè trompetè shtë Dios. Iurní ze'dè guèdchini Dadè Jesús de gube'e. Primèrè tsashtë ra tègulè nagualdí ldu'i diza'què. ¹⁷Iurní grè ra shmènè Jesús nanabani lu guédchiliu juntè con ra naguashtë ladi ra tègulè, guèldisè mè lè'è rai' lu guédchiliu parè guiá hia'a la'ni shcahi. Guiagtsa'guèlú hia'a lè'è Dadè Jesús iurní. Zni guèlezènú hia'a lè'è mè parè siemprè. ¹⁸Zni gaquin, por ni gulè guadi'dzènú sa'l di'dzè rè' tè parè guèquitè ldu'u rall nu tsaldí ldu'u rall más.

5 Rquèa'a lu tè bèchi la sahia, de què adè rquí'nidi'i gac bè'a hia'a pè dzè, nilè ca iurè guèdchini Dadè Jesús ²purquè bien nané hia'a guèdchini mè dzè ra mènè adè rzu nasínidi'i rall, igual ziquè rdchini nguba'nè gue'lè. Zni guèdchini Dadè Jesús dzè adè pè llgabè runè ra mènè. ³Dzè lè'è mènè cagni'i: “Hia grè bèac dchi lu guédchiliu. Hia segurè nabani zá'ca'a.” Dzè ni de repèntè guèdchini Jesús ziquè rna'zi dulurè ra na'a nanua'a shíni'. Zni guèdchini mè parè guèzalú mè guédchiliu nu adè chu mènè lda'a lu cashtigu rè'. ⁴Perè lè'è tè bèchi la sahia, hia nanú llni guèc tè, tè adè guèdchini dzè ni guèc tè ziquè rdchini tubi nguba'nè terciuni. ⁵Grè hia'a nanú llni la'ni guéca'a nu rdè'è hia'a cuendè ra cusè narni'i Dios. Hiadè nacahi la'ni guéca'a nu hiadè rzédi'i hia'a ziquè rzè ra mè gue'lè. ⁶Por ni hiadè chu gúnèdi'i duldè ziquè duldè narunè ra mènè

nanadë guënëdi'i Dios, sino quë guëdzú nasini hia'a nu guëagná ldu'u hia'a de quë juici shtë Dios napë quë guëdchini. ⁷Ra narunë duldë adë rdé'ëdi'ill cuendë de quë mizme lë'ë rall rguili rall cashtigu shtë Dios parë lë'ë rall. Na rall ziquë ra narga'si gue'lë nu ziquë ra narzuu'dchi. Adë rdé'ëdi'i rall cuendë pë quëhunë rall. ⁸Perë lë'ë hia'a nabani zá'ca'a delantë lu Dios. Guëdzú sini hia'a parë adë guësínidi'i mëdzabë lë'ë hia'a lu duldë. Tubi suldadë rácull con gui'bë nashábëll nu rzú'bëll casco parë rúnëll defender cuerpë shtënéll iurë rdildi rall. Igual lë'ë hia'a napë quë guëdé'na'a defender lë'ë hia'a lu Satanás. Tsaldí ldu'u hia'a shti'dzë Dios de quë gunë më salvar lë'ë hia'a. Gac shtu'u hia'a lë'ë më parë adë gúnëdi'i Satanás gan guësiguëll lë'ë hia'a. ⁹Adë gudíliidi'i Dios lë'ë hia'a parë gunë më cashtigu lë'ë hia'a sino quë parë guëne'e më vidë sin fin. Rzëlaa'dchi më vidë parë lë'ë hia'a purquë hia gudilli Dadë Jesucristo cuendë shtë hia'a. ¹⁰Guti më lu cruz por lë'ë hia'a parë guëdápa'a vidë con lë'ë më la'ni gube'e. Si talë nianá nabani hia'a u hia guti hia'a guëbani hia'a con lë'ë më. ¹¹Por ni tsagla'guë guëni'inú të ra sa' të con diza'quë rë' parë su rall firmë lu shnezë më.

**Rni'inú Pablo lu ra narialdí
ldu'i diza'quë**

¹²Ziquë bëchi la sahia rnia'a lu të, gulë bëzu'bë diaguë shti'dzë ra naquëhunë shchi'ni Dios entrë lë'ë të, ra naná cabësë grupë shtë të. ¹³Napë quë gunë të rëspëti nu

gac shtu'u të lë'ë rall purquë gudili më lë'ë rall parë shchi'ni më. Gulë guquërelde za'quë; adë pë dishi'bi runë të. ¹⁴Tambiën rnia'a lu të ziquë bëchi la sahia, gulë guni'inú lu ra mënë nané'di'i gunë dchi'ni. Gulë bënë animar lë'ë narunë faltë tsaldí ldu'i diza'quë. Gulë bënë compa'ni nala'di su firmë lu shti'dzë më. Adë tsasháquëdi'i ldu'u të con ra sa' të.

¹⁵Gulë guná, adë nádi'i bien gunë të vengar tubi sa' të. Adë rgúdi'i të galguezë. Mejurë gudili lla gunë të bien con grë ra sa' të nu con grë mënë la'ni guë'dchiliu.

¹⁶Guëdubi tiempë gulë bëquitë ldu'u të. ¹⁷Tsagla'guë guadi'dzënu të Dios nu gulë guna'bë lu më guëdubi tiempë. ¹⁸Grë lo quë nacazac të, gulë bédë'e graci lu më purquë ni na voluntá shtë më gunë të. Lë'ë ni na voluntá shtë më parë grëtë' narialdí ldu'i diza'quë shtë Jesucristo.

¹⁹Adë rcuél'zëdi'i të shchi'ni Espíritu Santo. ²⁰Adë rquë guiá'adi'i të diza'quë narni'i mënë lu të por pudërë shtë Dios. ²¹Iurë ze'dë guëni'i tubi nguiu tubi di'dzë lu të, gulë bësë'din gu nahin diza'quë shtë Dios. Talë nahin shti'dzë Dios, gulë bëa'nënuhin perë si talë adë nádi'in shti'dzë Dios, adë rëa'në guënúdi'i tëhin. ²²Gulë bësa'në grë cusë mal.

²³Rna'bë na'a lu Dios narcue'dchí la'ni ldu'u hia'a, gunë më compa'ni lë'ë të parë gunë të cumplir grë narac shtu'u më. Gac të niétiquë shmënë më. Rna'ba lu më të guëzunë më almë shtë të nu espíritu shtë të. Gunë Dios compa'ni lë'ë të parë adë gunë dchi'ni të cuerpë

shtë të lu cusë mal. Guëa'në të limpi sin
duldë dzë naguëdchini Dadë Jesucristo.

²⁴Dios gudili lë'ë të parë gac të shmënë
më. Adë rúnëdi'i më cambi shti'dzë më.
Guldí më iurë rni'i më lu të; gunë më
cumplir grë cusë rë'.

Ndë'ë gualú cartë shtë

Pablo con tubi saludë

²⁵Quëhuna ruëguë lu të bëchi la sahia,
gulë guna'bë lu Dios por lë'ë na'a.

²⁶Gulë bë'në saludar grë ra
narialdí ldu'i diza'quë nga'li
con tubi abrasë nacagshe'ldë
na'a.

²⁷Rna'ba lu të ziquë muzë
shtë Jesucristo, bi'ldi cartë rë'
lu grë ra shmënë Dadë Jesús
narëta' nga'li.

²⁸Rna'ba lu Dadë Jesucristo
guëne'e më llëru'bë bendición parë
lë'ë të. Zni gaquin. Amén.